



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA E PERGJITHSHME PËR MBROJTJEN E TË DHËNAVE PERSONALE
DREJTORIA E HETIMIT SEKTORIAL DHE SIGURISË SË TË DHËNAVE

Nr.1625/5 prot.

Tiranë më 10.11.2022

VENDIM

Nr. 46, datë 10.11.2022

**PËR KONTROLLUESIN “AGJENCIA SHTETËRORE PËR TË DREJTAT
DHE MBROJTJEN E FËMIJËS”**

Në mbështetje të neneve 29, 30 dhe 32 të ligjit nr. 9887, datë 10.03.2008 “Për mbrojtjen e të dhënave personale” i ndryshuar (në vijim, “Ligji”), neneve 77-112 të ligjit nr. 44/2015 “Kodi i Procedurave Administrative të Republikës së Shqipërisë” (në vijim, “Kodi i Procedurave Administrative”), procesverbalit të hetimit administrativ dhe provave të administruara në ngarkim të Kontrolluesit “Agjencia Shtetërore për të Drejtat dhe Mbrojtjen e Fëmijës” (në vijim, “Kontrolluesi”),

KONSTATOVA SE:

Në zbatim të Urdhrit nr. 157 datë 26.09.2022 të Komisionerit për të Drejtën e Informimit dhe Mbrojtjen e të Dhënave Personale, u krye hetimi administrativ pranë kontrolluesit me objekt:

- Verifikimi i zbatimit të detyrimeve sipas Rekomandimit Nr. 69, datë 13.12.2019 të Komisionerit për të Drejtën e Informimit dhe Mbrojtjen e të Dhënave Personale, për kontrolluesin “Agjencia Shtetërore për të Drejtat dhe Mbrojtjen e Fëmijës”.

Komisioneri, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit pranë Kontrolluesit, vëren se:

1. Kontrolluesi nuk ka publikuar në faqen zyrtare www.ashdmf.gov.al, “politikat e privatësisë” në kundërshtim me nenin 18 të Ligjit, dhe në përmbushje të pikës 2 të Rekomandimit Nr. 69, datë 13.12.2019, (në vijim, “Rekomandimi”) të Komisionerit.

Subjektet e të dhënave personale nuk informohen mbi qëllimin dhe mënyrën e përpunimit të të dhënave personale, personin që do t’i përpunojë të dhënat, të

drejtat ligjore që gëzojnë, afatin e mbajtjes së të dhënave, dhe masat e sigurisë, në kundërshtim me parashikimet e nenit 18 të Ligjit.

Zyra e Komisionerit vlerëson se, informimi i subjekteve të të dhënave personale është një ndër detyrimet bazë të Kontrolluesit, pasi i mundëson atyre njohjen me të drejtat që u njeh Ligji, si dhe ushtrimin e këtyre të drejtave në praktikë. Mos përmbushja e këtij detyrimi, nga ana e Kontrolluesit, mund të sjellë pasoja sa i përket privatësisë dhe përpunimit të të dhënave personale të subjekteve të të dhënave.

Në këtë kuadër, publikimi i rubrikës “*politikat privatësisë*” në faqen zyrtare të Kontrolluesit përmbush më së miri qëllimin e informimit përkundrejt subjekteve të të dhënave.

2. Nga verifikimi i kryer në regjistrin elektronik të subjekteve kontrolluese dhe në protokollin e Zyrës së Komisionerit, rezultoi se Kontrolluesi ka përmbushur detyrimin për njoftim në zbatim të nenit 21 të Ligjit dhe në përmbushje të pikës 1 të “*Rekomandimit*” .

Nga ana tjetër, nga analizimi i përmbajtjes së njoftimit, rezultoi se Kontrolluesi nuk ka kryer përditësimin përkatës për ndryshimin e gjendjes së njoftimit të përpunimit të të dhënave, sa i përket:

- ✓ Deklarimin në rubrikën 3, “*Kategoritë e subjekteve të të dhënave personale që përpunohen*”, të tilla si “*fëmijë*” “*nxënës*” dhe “*prindër*” ;
- ✓ Deklarimin në rubrikën 5, “*të dhëna sensitive që përpunohen*” për kategoritë e subjekteve të të dhënave personale që përpunohen “*fëmijë*”, “*nxënës*” dhe “*prindër*”;
- ✓ Deklarimin në rubrikën 6, “*qëllimi i përpunimit*” për kategoritë e subjekteve të të dhënave personale që përpunohen “*fëmijë*” , “*nxënës*” dhe “*prindër*”;
- ✓ Deklarimin në rubrikën 7, “*marrësi i të dhënave personale*” kontrolluesi nuk ka deklaruar partnerët, në cilësinë e subjekteve marrës.

Zyra e Komisionerit vlerëson se realizimi i përditësimit për ndryshimin e gjendjes së njoftimit të përpunimit të të dhënave është i rëndësishëm pasi i jep mundësinë subjekteve të të dhënave të informohen mbi përpunimin që kryen kontrolluesi dhe realizimin e detyrimeve ligjore. Kjo i jep mundësi reale subjektit të të dhënave për të ushtruar në mënyrë korrekte të drejtat që i jep ligji.

Në përfundim të procesit të hetimit administrativ, referuar provave dhe konstatimeve në vend, grupi i hetimit administrativ hartoi procesverbalin i cili u lexua në prani të palëve. Lidhur me konstatimet e grupit të hetimit administrativ, përfaqësuesi i Kontrolluesit u

shpreh se institucioni po përmirëson konstatimet, dhe se aktualisht, ka mungesa në staf (IT, dhe jurist).

Në respektim të së drejtës për t'u dëgjuar, në zbatim të neneve 87-89 të *Kodit të Procedurave Administrative*, Kontrolluesi është ftuar nga ana e Komisionerit përpara dhënies së vendimit të tij përfundimtar, të marrë pjesë në seancë dëgjimore.

Përfaqësuesi i Kontrolluesit është paraqitur në seancën dëgjimore të organizuar nga Zyra e Komisionerit, ka pranuar shkeljet e konstatuara dhe ka deklaruar angazhimin për rikuperimin e shkeljeve të konstatuara gjatë hetimit administrativ të ushtruar.

Si përfundim, shkeljet e konstatuara gjatë ushtrimit të hetimit administrativ përbëjnë kundërvajtje administrative, në kuptim të germave "b" dhe "d" të pikës 1 të nenit 39 të Ligjit, përbëjnë kundërvajtje administrative dhe sanksionohen me gjobë, si më poshtë:

b) kontrolluesit, që nuk përmbushin detyrimin për të informuar, të përcaktuar në nenin 18 të këtij ligji, dënohen me 10 000 deri në 300 000 lekë;

d) kontrolluesit, që nuk përmbushin detyrimin për të njoftuar, sipas përcaktimit në nenin 21 të këtij ligji, dënohen me 10 000 deri në 500 000 lekë;

Në bazë të pikës 2, të nenit 39, të Ligjit, personat juridikë, për kundërvajtjet e mësipërme administrative, dënohen me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, Zyra e Komisionerit vlerëson faktin që Kontrolluesi gjendet para shkeljeve të përsëritura, serioze si mos përmbushja e detyrimeve të lëna nga Rekomandimi, të cilat lidhen ngushtësisht me përpunimin e ligjshëm, dhe garantimin e të drejtave të subjekteve të të dhënave personale.

PËR KËTO ARSYE:

Sa më sipër, në zbatim të neneve 18, 21, 22, 29, 30, 39, pika 1 germat "b" dhe "d" si dhe nenet 40 dhe 41 të Ligjit,

V E N D O S A

1. Dënimin e Kontrolluesit me gjobë në vlerën 40.000 (dyzetë mijë) lekë, për shkelje të detyrimit të përcaktuar në nenin 18 të Ligjit;
2. Kontrolluesi në zbatim të neneve 21 dhe 22 të Ligjit, të kryejë përditësimin e "Njoftimit", në lidhje me ndryshimin e gjendjes së përpunimit të të dhënave personale për të cilat është përgjegjës;
3. Kontrolluesi në zbatim të nenit 18 të Ligjit të marrë masa për publikimin e "politikave të privatësisë" në faqen zyrtare.

4. Në zbatim të pikës 1 të nenit 32 të Ligjit, të përmbushen detyrimet sipas këtij akti brenda afateve si vijon:

(i) brenda 15 (pesëmbëdhjetë) ditëve, detyrimet e treguara në pikat 2 dhe 3 më sipër;

Afatet e sipërpërmendura fillojnë nga data e marrjes në dijeni të këtij akti;

5. Kontrolluesi të njoftojë Zyrën e Komisionerit për masat e marra;

6. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij Vendimi. Me kalimin e këtij afati, ky Vendim kthehet në titull ekzekutiv dhe ekzekutohet në mënyrë të detyrueshme nga Zyra e Përmbartimit;

7. Kundër këtij Vendimi mund të bëhet ankim në Gjykatën Administrative të Shkallës së Parë Tiranë, brenda 30 (tridhjetë) ditëve nga komunikimi i këtij Vendimi.

Ky Vendim u shpall sot më datë 10.11.2022.

KOMISIONERI

Besnik Dervishi